

Kojović s Nelsonom: Glas Naše stranke za mandataru Vijeća ministara zavisit će od odnosa prema NATO-u



Predsjednik Naše stranke Predrag Kojović primio je danas u radnu posjetu delegaciju Ambasade Sjedinjenih Američkih Država u našoj zemlji, predvođenu ambasadorom Ericom Nelsonom. Tema razgovora bila je aktuelna politička situacija, formiranje vlasti i NATO put BiH.

Predsjednik Naše stranke je ambasadora informisao o aktivnostima Naše stranke kao jedne od stranaka koje nose politiku aktualne Vlade Kantona Sarajevo te o planovima za nastavak konstruktivnog djelovanja u interesu građana na svim administrativnim nivoima Bosne i Hercegovine.

Razgovor se vodio i o daljnjim planovima na jačanju Bh. bloka i učvršćivanja partnerskih odnosa sa Socijaldemokratskom partijom BiH, kao i planovima za širenje utjecaja ovog bloka u onim dijelovima zemlje gdje trenutno nema značajnije političko prisustvo.

Bilo je razgovora i o učešću SAD u Bosni i Hercegovini kao pouzdanog partnera naše zemlje, što se iz godine u godinu dokazuje političkom podrškom pozitivnim procesima u BiH ali i konkretnim programima pomoći koji se implementiraju putem USAID-a i drugih institucija američke vlade.

Kojović je istakao kako je podrška SAD integrativnim procesima unutar BiH ali i njenom učešću u integrativnim procesima na evropskom kontinentu bila i ostala ključan faktor za budućnost ove zemlje i garant dobre perspektive za njene građane.

Istaknuta je puna podrška Naše stranke članstvu Bosne i Hercegovine u NATO savezu, kao i skepsa prema dogovoru lidera SDA, SNSD i HDZ o formiranju Vijeća ministara, posebno u pasusima koji se tiču NATO integracija, upotreba termina legitimni etnički predstavnici u kontekstu novog Izbornog zakona u BiH i nepostojanje volje za uklanjanje diskriminatorskih odredbi iz Ustava BiH.

Kojović je ponovio ranije izrečeni stav da će glasanje Naše stranke o Vijeću ministara u Parlamentarnoj skupštini BiH zavisiti od stava mandataru prema Godišnjem nacionalnom programu (ANP).

Uz ambasadora Nelsona delegaciju su činile još direktorica Misije USAID u BiH Nancy J. Eslick i šefica Političkog odjela Ambasade SAD Kate McGeary.

Date: 09-08-2019